

四庫全書

經部

欽定四庫全書

經部

春秋公羊傳讞卷一

詳校官監察御史<sub>臣</sub>徐如澍

給事中<sub>臣</sub>溫常綬覆勘

謄錄監生<sub>臣</sub>胡瀚

欽定四庫全書

春秋公羊傳讞卷一

宋 葉夢得 撰

隱公

元年春王正月

元年者何君之始年也春者何歲之始也王者孰謂  
謂文王也曷為先言王而後言正月王正月也何言  
乎王正月大一統也公何以不言即位成公意也何  
成乎公之意公將平國而反之桓曷為反之桓桓幼

而貴隱長而卑其為尊卑也微國人莫知隱長又賢諸大夫扳隱而立之隱於是焉而辭立則未知桓之將必得立也且如桓立則恐諸大夫之不能相幼君也故凡隱之立為桓立也隱長又賢何以不宜立立適以長不以賢立子以貴不以長桓何以貴母貴也母貴則子何以貴子以母貴母以子貴

古者以元訓長與始而兼有善意故曰元者善之長也始年稱元年猶月朔稱吉月伊訓曰惟元祀

而序曰太甲元年則三代以來以始年稱元年者尚  
矣此固不必為義而傳以此起問蓋疑魯不得稱元年  
爾何休曰王者然後改元立號春秋託新王受命於  
魯害經之弊莫甚於此王者以正朔一天下故巡守  
之所謹者協時月正日而已乃若各隨其即位之年  
一二以數之此天子諸侯之所同也初未嘗為之禁  
自漢以後既一於用人正始立號以紀年改號則改  
年矣而後天下始一於用天子之年非禁其改元禁

其改號也而何休乃因其當時所見為說言諸侯不得改元立號方春秋時安得所謂號哉此公羊啓之也 經所立者一王之大法也適因魯史以著之而非以為魯史何獨文王之王哉自春而上見其所受命者天自正月而下見天下之所聽者王故曰天王此言之序固不可以正月先王也 禮所辨者適庶而所謹者長少立適以長不以賢是也衆妾之子皆庶子豈有妾而又以貴賤為別者哉古者立庶亦

皆以長爾何以知之周景王太子穆后之子壽卒王  
猛壽之弟也子朝以庶長爭立故告諸侯曰王后無  
適則擇立長魯襄公薨無適立胡女敬歸之子子野  
以毀卒季氏欲立敬歸之弟子稠是為昭公穆叔不  
欲曰太子死有母弟則立之無則立長蓋太子之弟  
亦適也王猛雖幼而壽之母弟是以子朝以庶長欲  
立而春秋不與使猛而非壽母弟則子朝可立矣昭  
公雖敬歸娣之子而子野非適故穆叔不欲使子野

而適則昭公可立矣楚平王卒昭王以庶子為太子而子西庶長也子常欲立子西曰太子弱其母非適也子西長且好善立長則順建善則治夫無適而有長雖昭王已為太子子常猶欲易之况未立乎則庶子未有不以長先者也晉使趙盾納捷菑於邾捷菑晉出也驪且齊出也傳載邾人之辭曰捷菑也四驪且也六雖然貴則皆貴也驪且也長趙盾弗克納而還春秋與之則是捷菑驪且皆非正而驪且以長得



立此經之明驗傳豈不知之乎蓋但見魯成風以後  
皆致之為夫人遂立子以母貴母以子貴之論何休  
因謂禮適夫人無子則媵與姪娣更以左右為貴賤  
以次立其子且以妾子立則母得為夫人此皆於禮  
未之有聞是亦傳誤以仲子為桓母求其義不得而  
臆決之以為桓幼而貴隱長而賤所以從而附會為  
之說也

三月公及邾婁儀父盟於昧

及者何與也會及暨皆與也曷為或言會或言及或  
言暨會猶最也及猶汲汲也暨猶暨暨也及我欲之  
暨不得已也儀父者何邾婁之君也何以名字也曷  
為稱字褒之也曷為褒之為其與公盟也與公盟者  
衆矣曷為獨褒乎此因其可褒而褒之此其為可褒  
奈何漸進也昧者何地期也

會者禮之名凡經書會於某者皆別於盟之辭非別  
於及之辭而公羊穀梁皆誤與會侵會伐會圍會救

之會同為義故以會及暨三名皆為與復求其所以  
異者又以最與汲汲暨暨別之耳會自會盟自盟二  
名本不相關惟內辭或自我外辭或自人然後有會  
盟有及盟此但以別盟爾而會盟者非向所謂禮者  
也以人從我而我接之謂之及以我從人而人主之  
謂之會此乃可謂最與會侵會伐會圍會救之義同  
也及連辭也會聚辭也乃外辭則無辨焉直曰盟而  
已則所謂直盟者也及與會未有參見者惟不得已

而假之以為義故首止之會尊王世子不敢與同會  
則先言及諸侯而後言會王世子黃池之會進吳子  
為兩霸則先言會晉侯而後言及吳子以此別外會  
春秋之變例不可以通內盟也若及鄭師伐宋及宋  
人衛人伐邾及江人黃人伐陳此又內之微者伐辭  
以別於會伐者義自不同而公羊概欲一字齊之所  
以迷而弗悟也必以及為汲汲我欲之則邾儀父本  
為與公盟故襄而得字是乃汲汲求於我者我何為

反書及乎惟穀梁以及為內為志會為外為志似近之而又不辨其為直會直盟者左氏於直會多言會而不盟或以為後有盟而經不書似謂會必有盟者蓋又不知會自會之義而併以會盟為禮之會其失之愈遠也言褒其失與左氏同傳知其不可通故又為漸進因其可褒而褒之之論其說愈妄桓書公會邾儀父盟於赭何為而再字乎

夏五月鄭伯克段于鄆

克之者何殺之也殺之則曷為謂之克大鄭伯之惡也曷為大鄭伯之惡母欲立之已殺之如勿與而已矣段者何鄭伯之弟也何以不稱弟當國也其地何當國也齊人殺無知何以不地在內也在內雖當國不地也不當國雖在外亦不地也

段不稱弟段不能弟莊公亦不能以弟弟之交譏之辭也段本非篡弑者不得與齊無知當國並言也不地此內外之辨爾在內雖當國不地則不當

國而在內者宜地矣凡諸國書殺其大夫何以不地乎不當國雖在外亦不地則當國而在外者宜地矣蔡人殺陳佗何以不地乎已殺者皆已死之辭也何休謂殺於國內禍已絕故不地則殺於國外禍亦絕矣安能復交連鄰國為內難而必錄其地乎

秋七月天王使宰咺來歸惠公仲子之賵

宰者何官也咺者何名也曷為以官氏宰士也惠公者何隱之考也仲子者何桓之母也何以不稱夫人

桓未君也。賄者何喪事有賄賄者蓋以馬以乘馬束帛車馬曰賄。貨財曰賄。衣被曰襚。桓未君則諸侯曷為來賄之隱為桓立故以桓母之喪告於諸侯。然則何言爾成公意也。其言來何不及事也。其言惠公仲子何兼之兼之非禮也。何以不言及仲子。仲子微也。宰周公者非以宰氏王之三公自應舉氏今誠宰士豈可遂以宰為氏乎。說已見左氏傳。既為母以子貴之論。故謂未君不稱夫人則既君當稱夫人矣。亂。



嫡庶以開妾母之僭尚何以言經仲子非桓母說已  
見左氏 隱立而告桓母之喪於諸侯天王以七月  
來賵是仲子死在隱立之後七月之前其賵為未緩  
也安得言不及事以來起問乎蓋謂榮叔歸成風舍  
且賵不言來來者自外至之辭榮叔不親至而使人  
致之故不言來非以其及事也若然則秦人來歸僖  
公成風之襚反可言及事乎此蓋亦以惠公仲子為  
兩人之誤也 仲子誠以微而不足錄則沒而不書

金史紀事本末卷之三  
可矣今既顯言仲子不得言微宋人弑其君與夷及其大夫孔父經未嘗不以尊者及卑者君可以及臣則主豈不可及妾乎此亦強為二人而為之辭也

九月及宋人盟于宿

孰及之內之微者也

兩微者之盟不志於經畧之也凡內辭言及而不名其人者皆公與之盟有所耻則諱而沒公此言宋人實微者也以公與微者盟為耻是以但言及

然公及莒人盟於包來見公而不没者公欲之也  
何以知之大夫不敵公公欲之則見公非公欲之  
則没公書法蓋云爾莊書公及齊大夫盟於莒者  
公所欲也文書及晉處父盟者非公所欲也大夫  
猶然况微者乎

冬十有二月祭伯來

祭伯者何天子之大夫也何以不稱使奔也奔則曷  
為不言奔王者無外言奔則有外之辭也

公羊之學其妖妄迂恠莫大於黜周王魯以隱公託新王受命之論其說雖起於何休以元年君之始年推之學者猶疑此言不明見於傳或出東漢識緯之徒假公羊以附會然至於知儀父盟於昧以稱字為褒謂因其可褒而褒之為漸進夫國君即位諸侯求好而求盟春秋之常事也何獨於隱而褒儀父哉今於此復言王者無外謂祭伯為奔則加以有外之辭故諱奔而不言凡傳言王者無

外四其二以周王言之其一以周公言之獨此無  
所見若謂亦本於周則王子瑕固嘗出奔矣經豈  
諱之乎是與前三言不同蓋為魯辭非周辭也由  
是言之傳雖不正言王魯而其說則實以隱公為  
王而魯為內非何休之私矣春秋本以周室微弱  
諸侯僭亂正天下之名分以立一王之法若周未  
滅而黜之魯諸侯而推以為王則啓天下亂臣賊  
子乃自春秋始孰謂其誣經敢至是乎將正公羊

之失莫大於此學者不可以不察

公子益師卒

何以不日遠也所見異辭所聞異辭所傳聞異辭

聞見異辭之論分三世亦起於公羊末於獲麟所論  
謂春秋何以始乎隱祖之所逮聞者是也其意初但  
以已所逮聞者為見以父所逮聞者為聞以祖所逮  
聞者為傳聞其例在於日月故有日不日為之詳畧  
爾是以於桓會稷成宋亂亦云何休從而緣飾為之

說以所見之世臣子恩其君父尤厚故多微辭所聞之世為恩王父所殺故立煬宮不曰武宮曰所傳聞之世為恩高祖曾祖又殺故子赤卒不日子般卒曰此固未必皆傳意然傳實有以啓之矣蓋其於會稷言內大惡諱此其日言之何遠也以為此王父之所傳聞故不諱而曰之爾今何休於此又以昭定哀為已與父時所見文宣成襄為王父時所聞隱桓莊閔僖為高祖曾祖時所傳聞推其大夫卒曰不日為證考

之於經皆未嘗有是意也經之所褒貶者善惡若一  
以恩為隆殺如休所言叔孫得臣既以有罪略之而  
不得日矣而季孫意如負逐君之罪以厚恩而得日  
公子益師無駭以恩殺而不得日如此則善惡倒置  
賞罰無章又何以為經乎此固自何休之失然傳為  
例亦自不能堅既以桓遠而不諱成宋亂又復曰隱  
亦遠矣曷為為隱諱隱賢而桓賤也若但以賢與賤  
為別則又何以分三世而降殺乎至於以所傳聞之



世為見治起於衰亂以所聞之世為見治升平以所見之世為著治太平其說亦妖妄誣聖亂經皆自公羊發之故自漢以來言讖緯者悉祖公羊不可以不正也何休不足言矣

二年

無駭帥師入極

無駭者何展無駭也何以不氏貶曷為貶疾始滅也始滅昉於此乎前此矣前此則曷為始乎此託始焉

爾曷為託始焉爾春秋之始也此滅也其言入何內  
大惡諱也

無駭非展無駭說已見左氏春秋所為法者正名以別嫌  
也雖曰諱惡必有婉其辭而微見者未有併其實而沒  
之者也傳例入者得而不居今滅而謂之入則與前言入  
向何別乎大抵公羊於隱傳多以託始為言蓋以示新  
王之意天下無道禮樂征伐自諸侯出凡隱所見盟  
會入伐取皆諸侯所不得為非始也而獨於入極取牟

婁言疾始盟則以為褒會伐則不為義豈實經意哉

九月紀履綸來逆女

紀履綸者何紀大夫也何以不稱使婚禮不稱主人  
然則曷稱稱諸父兄師友宋公使公孫壽來納幣則  
其稱主人何辭窮也辭窮者何無母也然則紀有母  
乎曰有有則何以不稱母母不通也外逆女不書此  
何以書譏何譏爾譏始不親迎也始不親迎昉於此  
乎前此矣前此則曷為始乎此託始焉爾曷為託始

焉爾春秋之始也女曷為或稱女或稱婦或稱夫人  
女在其國稱女在塗稱婦入國稱夫人

婚禮宗子無父母命之親沒已躬命之支子則稱  
其宗弟稱其兄故國君求婚於諸侯曰請君之王  
女與寡人共有宗廟之事此親沒之辭孰謂不稱  
主人哉稱諸父兄猶云可也稱師友未之前聞豈  
有合二姓之好以承其宗廟之重而師友得以主  
之乎宋公使公孫壽來納幣此正親沒而躬命之

者也傳但見履綸不言使故云爾不知此乃母命之辭經於履綸與公孫壽各一見正也婚禮納采問名納吉納徵請期親迎而逆女不與也逆女非婚禮蓋謂國君圖婚於他國既納徵矣使其卿逆而歸之國中而後親迎則逆女與親迎固自不同婚禮主人請期賓告曰某日使者反命主人曰聞命矣及期初昏父親醮子而命之迎主人筵几於廟而拜迎於門外壻執鴈入升堂再拜奠鴈降出

御婦車而壻授綬先俟於門外此親迎之禮也故  
曰冕而親迎豈有越國而曰冕者乎春秋諸侯及  
大夫多有娶於鄰國因逆遂成婚者如齊高固來逆  
女大夫逆而婚者也可名曰逆不可名曰親迎故  
經一以逆女書之先儒遂以逆女為親迎而不以  
逆女為譏蓋自公羊失之

十有二月乙卯夫人子氏薨

夫人子氏者何隱公之母也何以不書葬成公意也

何成乎公之意子將不終為君故母亦不終為夫人也

隱公之母妾也傳言隱公將不終為君故母亦不終為夫人是未嘗致之為夫人也則經安得以夫人子氏薨稱乎不成其為夫人則非特不書葬雖薨亦不得書矣成之為夫人則非特得書薨雖葬亦得書矣薨與葬在為夫人不為夫人未有為夫人而不書葬不為夫人而得稱夫人書薨者也然

則子氏蓋隱公之妻非母也公之妻則國人夫人之矣故公雖將不終於為君不稱夫人以臣子之辭不得不稱夫人書葬猶公之不得不稱公也

三年春王二月己巳日有食之

何以書記異也日食則曷為或日或不日或言朔或不言朔曰某月某日朔日有食之者食正朔也其或日或不日或失之前或失之後失之前者朔在前也失之後者朔在後也



日食記異也經無所損益因舊史之文而實書之爾  
非謂有失於朔之前後而經有日有不日也凡書某月  
某日而不言朔者食非其朔日官之失也書某月而  
不言日者日不可見則朔與否皆不可知史官之失也  
日官之失舊史不敢改史官之失經不敢增各從其實  
而已惟書某月朔而不言日者經成而後闕者也蓋  
後有日則朔之日可推非經之闕也

三月庚戌天王崩

何以不書葬天子記崩不記葬必其時也諸侯記卒  
記葬有天子存不得必其時也曷為或言崩或言薨  
天子曰崩諸侯曰薨大夫曰卒士曰不祿

經不書王國之事吾於左氏既言之矣凡天王記崩者  
非記其崩也以來赴而記也不記葬者非不記其葬  
也以公自往會為常事而不記也其有或書葬者有  
不合於禮因我以卿會之之非禮而併見之也若例以  
時而不書則何以見我往會之得禮非禮乎

癸未葬宋繆公

葬者曷為或日或不日不及時而日渴葬也不及時而不日慢葬也過時而日隱之也過時而不日謂之不能葬也當時而不日正也當時而日危不得葬也傳為此六例專在日月也使二百四十二年之間以事繫日無有一闕者則此例盡行或可矣若當日而或闕其日經既不敢輒增則所以為例者豈不盡廢哉日月為例公羊穀梁之說也以經考之

蓋無有盡契者故復以變例為之說夫褒貶取舍  
以義裁之則無常或可變也日月者有常而不可  
易日月而可變則復安所用例乎故渴葬與慢葬  
均於不得禮也渴葬則不及時而日慢葬則不及  
時而不日過時均於不能葬也或隱之而日或不  
隱之而日此何理也吾嘗以是徧求之未有不  
是兩可而得以移易者然後知所以為經者不在  
是也

四年春王二月莒人伐杞取牟婁

牟婁者何杞之邑也外取邑不書此何以書疾始取邑也  
外取邑不書是也取邑者或誘而取之或迫而取  
之或用兵而取之故不一以視滅國則猶以為輕  
矣是以略而不書伐者討罪之名也服則止矣故  
伐未有言勝敗者若伐而取邑則非伐也以問罪  
為名而攘其地其罪有大於直取者故凡外與內  
伐而取邑者未嘗不書猶伐而戰則言戰伐而圍

則言圍所以正伐之道也豈獨疾其始哉宋人伐鄭取長葛固不以始也蓋伐邾取濶東田及沂西田猶書而況邑乎

戊申衛州吁弑其君完

曷為以國氏當國也

州吁不氏未三命爾當國者謂其欲篡奪以為君也凡公子公孫弑未有非篡奪者大夫與國人弑未有篡奪者何待以氏不氏為別宋督弑其君與

夷此不氏者謂之當國可乎齊公子商人弑其君  
舍此氏者謂之不當國可乎

夏公及宋公遇于清

遇者何不期也一君出一君要之也

言不期則不得言有要之者也蓋其以汲汲為及例  
故於此欲強見我欲之意

秋翬帥師會宋公陳侯蔡人衛人伐鄭

翬者何公子翬也何以不稱公子貶曷為貶與弑公

也

翬不氏說已見左氏若以為與弑公貶傳言仲遂卒不於弑時貶於文則無罪於子則無年今翬於此猶未弑隱是於隱則無罪何為而豫貶之乎

五年春公觀魚于棠

何以書譏何譏爾遠也公曷為遠而觀魚登來之也  
百金之魚公張之登來之者何美大之之辭也棠者  
何濟上之邑也



言觀非也說已見左氏

九月考仲子之宮

考宮者何考猶入室也始祭仲子也桓未君則曷為祭仲子隱為桓立故為桓祭其母也然則何言爾成公意也

非也說已見左氏

初獻六羽

初者何始也六羽者何舞也初獻六羽何以書譏何

譏爾譏始僭諸公也六羽之為僭奈何天子八佾諸公六諸侯四

非也說已見左氏古者禮之大節有四而已天子也諸侯也大夫也士也天子七廟諸侯五廟大夫三廟士二廟此見於廟者也天子七月而葬諸侯五月而葬大夫三月而葬士踰月而葬此見於葬者也其於樂亦然故天子宫縣諸侯軒縣大夫判縣士特縣天子射以騶虞為節諸侯以貍首為節大夫以采蘋為節士以采芣為節未有季等諸侯

而各為之制者也故惟宮室車旗衣服各隨其命  
數其他未有不同者何此而獨以公侯為辨乎

宋人伐鄭圍長葛

邑不言圍此其言圍何彊也

邑不言圍以小事略之也然有所見焉則亦書圍  
彭城圍戚是也若伐而圍邑此正其非伐之道則  
何為而不書哉經但辨伐之正不正爾安在敵之  
強弱何休以伐於餘丘為例此伐而不圍者自不

得言圍也

六年春鄭人來輸平

輸平者何輸平猶墮成也何言乎墮成敗其成也曰  
吾成敗矣吾與鄭人未有成也吾與鄭人則曷為未  
有成狐壤之戰隱公獲焉然則何以不言戰諱獲也  
輸者歸物之名非墮物之名則輸平不得言墮成  
此鄭人來輸平爾而曰吾與鄭人未有成亦非是  
蓋傳誤以狐壤之戰在此時諱隱公之獲而以輸

平言之彼戰而獲隱公則其成固已墮矣何用復使人來告乎若曰鄭實不告假之以見公獲則經未有設虛辭者也據左氏狐壤之獲蓋公為太子時事在春秋前公羊不傳事竊聞之而不審是以併經意失之也

冬宋人取長葛

外取邑不書此何以書久也

非也說已見前

七年春

滕侯卒

何以不名微國也微國則其稱侯何不嫌也春秋貴賤不嫌同號美惡不嫌同辭

滕侯爵而謂之微國傳以為春秋貴賤不嫌同號何休云春秋王魯託隱公以為始受命王而滕子先朝公故春秋褒之稱侯以見義此雖非傳正文即傳論之葬蔡宣公發例曰卒何以名而葬不名

卒從正葬從主人從正云者以名告也何滕侯之  
卒猶不以名告乎若以為小國而不得從正則許  
男新臣卒男爵又在子下何以復名也蓋其意以  
不名見微國復以微國稱侯起問而言貴賤不嫌  
同號是實謂春秋託新王得擅進退諸侯爵見下  
有稱滕子者遂謂滕實子爵以褒而稱侯矣何休  
之言蓋有所授也

夏城中丘

中丘者何內之邑也城中丘何以書以重書也

中丘以夏城明知其非時左氏言之是矣城一邑亦國之常事何足以重言哉

齊侯使其弟年來聘

其稱弟何母弟稱弟母兄稱兄

母弟稱弟母兄稱兄是也以為齊年以母弟稱弟則非諸侯之尊弟兄不得以屬通何弟之云哉親親之義固以見褒貶則言之爾齊年稱弟私之也



不然陳招亦母弟也何以或稱公子或稱陳侯之弟乎

八年春

三月鄭伯使宛來歸郕

宛者何鄭之微者也郕者何鄭湯沐之邑也天子有事於泰山諸侯皆從泰山之下諸侯皆有湯沐之邑焉

非也說已見左氏

庚寅我入邲

其言入何難也其日何難也其言我何言我者非獨我也齊亦欲之

經凡直書事而不日者皆內辭也如城楚丘戌鄭虎牢成陳取鄆之類是矣其特言我者皆斥公以見貶之辭如齊伐我吳伐我之類是矣此本不與齊事何以見齊亦欲之乎九月辛卯公及莒人盟於包來

公曷為與微者盟稱人則從不疑也

何休以為人實莒子以公行微諸侯不肯從故使  
稱人則隨從公不疑其迂誕蓋如此隱公本不疑  
諸侯不從何為經遽設疑而見其從乎凡經人諸  
侯者皆外之之辭也莒本無罪疑不從公而貶之  
為人是經以疑似而妄貶諸侯矣

冬十有二月無駭卒

此展無駭也何以不氏疾始滅也故終其身不氏

滅國與弑君之罪孰重翬弑隱公言終隱之篇貶

無駭但滅國言終其身貶使無駭卒於桓公之世  
則猶當見貶於桓公是滅人之國重於弑已之君  
也可乎

九年春

俠卒

俠者何吾大夫之未命者也

傳前於無駭入極不氏言貶其始滅國於翬伐鄭  
不氏言貶其與弑公則謂大夫不氏者皆經之貶

辭也今於使與後柔溺復以為吾大夫之未命者  
既曰大夫矣安有未命而可名以大夫者乎且無  
駭也輦也俠也柔也溺也皆不氏者亦何以別其  
為貶與未命之異彼特以無駭有入極之事輦有  
弑公之罪而妄意之爾非實有聞於經者吾嘗求  
其說而後知公羊穀梁皆未嘗見周禮不知諸侯  
卿大夫之制故於經書氏不氏之際每紛然妄為  
之辭而卒不辨按周官大國次國小國皆有卿有

大夫有士大國次國之卿皆三命其大夫皆再命  
其士皆一命小國之卿皆再命其大夫皆一命其  
士皆不命而王制大國三卿皆命於天子次國三  
卿二卿命於天子一卿命於其君小國二卿皆命  
於其君鄭氏謂小國亦三卿一卿命於天子二卿  
命於其君以為文誤此其說是也參二經論之春  
秋所謂大夫者合周禮之卿大夫而言也凡三命  
者皆以名氏見再命者以名見而不氏一命者以

人見而名氏皆不見公子之重視大夫亦必三命而後得氏見再命則名而已此因先王之舊制以爲書法者也魯次國也隱桓之世下成康爲未遠猶能守先王之典禮卿大夫之命數不敢僭而相越故其卿三命當以名氏見則公子益師公子彊是也其大夫再命當以名見則無駭翬俠柔溺是也公羊穀梁但見莊僖以後卿大夫無不書名氏者不知大夫日強而世卿專國無不僭而三命者故

於隱桓之世每為異論吾以其後言單伯為吾大  
夫之命乎天子者推之則其所謂未命者公自命  
之而非天子之所命者也其意若以為天子之所  
命者為命大夫當以名氏見公之自命者不得為  
命大夫當以名見而不氏不知天子與公所命雖  
不同而其命數則一天子之命卿亦三命也君自  
命之卿亦三命也天子之命大夫亦再命也君自  
命之大夫亦再命也何以天子命之則曰大夫公



自命之則不曰大夫乎既曰天子之命大夫以名氏見矣然而單伯稱邑與爵而不名則又非公子益師公子彊之例此其說所以反覆皆不通者未嘗知周禮之過也由此觀之凡傳言大夫不氏者皆可以是類求矣

十年

夏鞏帥師會齊人鄭人伐宋

此公子鞏也何以不稱公子貶曷為貶隱之罪人也

故終隱之篇貶也

非也說已見前

六月壬戌公敗宋師於管辛未取郛辛巳取防

取邑不日此何以日一月而再取也何言乎一月而再取甚之也

內取外邑或書時如僖春伐邾取須朐之類或書月如宣春正月伐莒取向之類或書日如文春伐邾三月甲戌取須朐之類初未嘗不日何言取邑不

日而以為例凡不日者皆以見伐取同時也此既以壬戌敗宋師辛未取郕辛巳取防自不得不各見日以為辨必謂甚一月再取則甲戌取須朐豈再取乎

宋人蔡人衛人伐載鄭伯伐取之

其言伐取之何易也其易奈何因其力也因誰之力因宋人蔡人衛人之力也

此取三國之師非取載也何以知之鄭之所怨者

三國而已以人情而言救載以拒三國則有之矣  
安得反附三國而困載乎載蓋附庸之國嘗屬於  
鄭者三國以鄭故伐其與國故鄭復乘其玩兵之  
弊而取其師爾

十有一年春滕侯薛侯來朝

其言朝何諸侯來曰朝大夫來曰聘其兼言之何微  
國也

滕薛皆侯爵不得為微國是亦所謂託始王魯因

其來朝褒之以為侯者也晉荀庚來尋盟衛孫良夫來尋盟不同日尚猶各見滕薛雖微國亦安得兼言之若遂以魯為王耶則以諸侯而旅見非特徵國也雖大國亦可矣若以周末滅魯猶列國則雖微國亦不得而旅見矣有天子在上乃使諸侯得旅見列國之君尚足以為王法哉

冬十有一月壬辰公薨

何以不書葬隱之也何隱爾弑也弑則何以不書葬

春秋君弑賊不討不書葬以為無臣子也子沈子曰  
君弑臣不討賊非臣也不復讎非子也葬生者之事  
也春秋君弑賊不討不書葬以為不繫乎臣子也公  
薨何以不地不忍言也隱何以無正月隱將讓乎桓  
故不有其正月也

既以君弑賊不討不書葬為天下之大法矣則不得  
更以隱之為義以隱無正月起問是也以為將讓  
桓而不有其正月則元年何以書正月哉此隱失其

正存其元年以見正而去其二年以後以見貶故三年四年十年言王二月七年言王三月者正月適無事也其餘言春而不言月者事在正月而因以去之者也或者以為此十年正月適無事故不書然則八年三月前書宋公衛侯遇於垂九年三月前書天王使王季來聘安知其非正月事乎

--	--	--	--	--	--	--	--



欽定四庫全書

經部

春秋公羊傳讞卷二

詳校官監察御史<sub>臣</sub>徐如澍

給事中<sub>臣</sub>溫常綬覆勘

謄錄監生<sub>臣</sub>胡潮

欽定四庫全書

春秋公羊傳讞卷二

宋 葉夢得 撰

桓公

元年春

鄭伯以璧假許田

其言以璧假之何易之也易之則其言假之何為恭也曷為為恭有天子存則諸侯不得專地也許田者何魯朝宿之邑也諸侯時朝乎天子天子之郊諸侯

皆有朝宿之邑焉此魯朝宿之邑也則曷為謂之許田諱取周田也諱取周田則曷為謂之許田繫之許也曷為繫之許近許也此邑也其稱田何田多邑少稱田邑多田少稱邑

鄭伯實以璧假田則自當書矣若以為有天子存諸侯不得專其地故變易為假以見其恭是經加之辭也隱公入邠取郛取防雖內辭而直書之以專地為不恭鄭伯但易田乃為之設恭辭乎作

經本以正天下之功罪若以天子存每為之辭則  
天下無可正之罪而經亦無貶矣 春秋正名周  
田而謂之許田其名亦亂矣此實隱十一年與齊  
鄭入許所分之田說已見左氏田者各繫其邑以  
為稱者也周之田不可為許之田許之田不可為  
周之田兼取兩國之邑不可以田多而論邑少邑  
亦兩也兼取兩國之田不可以邑多而論田少田  
亦兩也邑者兼田與邑皆得之名田者得田而不

得邑之名安得有田多邑少邑多田少者乎是亦  
不足以為例

二年春

三月公會齊侯陳侯鄭伯于稷以成宋亂

內大惡諱此其目言之何遠也所見異辭所聞  
異辭所傳聞異辭隱亦遠矣曷為為隱諱隱賢  
而桓賤也

傳既以惡大小論諱矣又以遠近為辨既以遠近

為辨矣又以賢與賤為辨三者不得並行則何者  
為正乎且此以書成宋亂為賤桓而不諱然戰于  
宋曰內不言戰言戰乃敗矣不言戰豈非諱乎狐  
壤之獲不言戰為賢隱而諱然公觀魚于棠何以  
書譏豈非不諱乎

秋

蔡侯鄭伯會于鄧

離不言會此其言會何蓋鄧與會爾

傳但見內言公及邾儀父盟于昧公及鄭伯盟于  
越外書齊侯鄭伯盟于石門齊侯衛侯盟于沙澤  
之類不言會故以為離不言會不知公會戎于潛  
公會齊侯于郕之類何嘗不言會乎若以此為鄧  
與會為三國則定十四年齊侯宋公會于洮豈洮  
亦與乎蓋傳不能辨會及之義以會為聚辭故妄  
與及為別何休以齊侯鄭伯如紀為例尤見其陋  
此朝也安得謂之會

三年

夏齊侯衛侯胥命于蒲

胥命者何相命也何言乎相命近正也此其為近正奈何古者不盟結言而退

非也說已見左氏

四年春正月公狩于郎

狩者何田狩也春曰苗秋曰蒐冬曰狩常事不書此何以書譏何譏爾遠也諸侯曷為必田狩一曰乾豆



二曰賓客三曰充君之庖

天子諸侯無事歲三田禮王制以為夏制今有三時而無夏何休以為春秋制飛鳥未去于巢走獸未離于穴恐傷害幼稚二說皆非是此亦傳未嘗見周禮之過也

夏天王使宰渠伯糾來聘

宰渠伯糾者何天子之大夫也其稱宰渠伯糾何下大夫也

王之下大夫春秋以名氏見上大夫則舉國爵今  
稱宰渠伯則非下大夫也加之以名謂桓弑君不  
朝而反聘之即其使而名以見貶也其曰宰則太  
宰矣桓公弑其君而立天子不能治天下莫能討  
而王使其宰聘之示加尊寵天理滅矣人道亡矣  
書天王言當奉天也而所為如此名糾尊卑貴賤  
之義亡矣人理既滅天運乖矣陰陽失序歲功不  
能成矣故不具四時

六年春正月寔來

寔來者何猶曰是人來也孰謂謂州公也曷為謂之寔來慢之也曷為慢之化我也

非也說已見左氏

秋八月壬午大閱

大閱者何簡車徒也何以書蓋以罕書也

大閱周制冬田之名也傳以為簡車徒則三年大比之名也其謂之罕以為自入春秋歷隱公未嘗

大閱而今始見耶則其罪非獨在桓公隱亦與之  
矣而隱無文以見也以爲自桓以來六年始大閱  
過其三年之制也則終桓之世不大閱亦無文以見  
也所謂以罕書者非書之法也然則大閱者常事  
也得其時制則不書今冬田而秋興之以是爲譏  
爾

蔡人殺陳佗

陳佗者何陳君也陳君則曷爲謂之陳佗絕也曷爲

絕之賤也其賤奈何外淫也惡乎淫淫乎蔡蔡人殺之

陳佗據左氏殺陳侯鮑之太子免而篡之位者也  
佗陳出厲公蔡出蔡人欲立厲公故以弑免之罪  
殺佗經以蔡人書之討賊之辭也傳蓋不知其事  
但見州吁為衛人所殺而陳佗為蔡人所殺故不  
敢以一辭推之然陳佗即所謂五父者任陳之事  
久矣今人篡而為君豈有淫獵于他人之境國人

無從之者而蔡人不知之乎

九月丁卯子同生

子同生者孰謂謂莊公也何言乎子同生喜有正也  
未有言喜有正者此其言喜有正何久無正也子公  
羊子曰其諸以病桓與

太子生國之大事所當書者也適繼隱桓之後而不見  
於他公故公羊意之以為喜有正爾不知他公之生嫡  
子或在為太子時薨或不及生而薨或嫡夫人無子或

雖嫡而不以太子之禮舉之唯莊公獨得其正所以書爾  
七年春二月己亥焚咸丘

焚之者何樵之也樵之者何以火攻也何言乎以火  
攻疾始以火攻也咸丘者何邾婁之邑也曷為不繫  
乎邾婁國之也曷為國之君存焉爾

咸丘魯地杜預之言是矣以出火非其時故書爾  
凡內伐國取邑未嘗不先言伐以正其伐之道况  
于焚乎咸丘誠邾邑亦當先見伐邾若曰君存君

焚而死耶則罪有大於焚宜有異文若但攻之而已則何用以君為重其言疾始火攻亦非是按經未有復書焚者亦何始之云

夏穀伯綏來朝鄧侯吾離來朝

皆何以名失地之君也其稱侯朝何貴者無後待之以初也

失地之君凡來奔于我者皆是也何嘗以其貴而盡以朝禮接之獨見于二君乎朝不朝在彼而已



使其實不朝雖以貴者待之安可以言朝使其實  
朝雖不以貴者待之安可以不言朝蓋失地之君  
有以奔來而不能朝者有不以奔來而能朝者各  
以其實書爾不以奔來而能朝者猶不失其君而  
圖復謂之寄公黎侯寓于衛者是也故名之名之  
者亦所以別二君也

八年春正月己卯烝

烝者何冬祭也春曰祠夏曰禘秋曰嘗冬曰烝常事

不書此何以書譏何譏爾譏亟也亟則黷黷則不敬  
君子之祭也敬而不黷疏則急急則忘士不及茲四  
者則冬不裘夏不葛

周春正月者夏之冬建子之月烝之節也傳見後  
書五月丁丑烝以為非時故見烝爾若冬不烝可  
以五月烝乎是固常事不必書所以書者以桓弑  
君而篡國無辭以見其宗廟故求豐於祀以媚其  
祖考使隱而有知其吐之矣所以烝獨書於桓雖

得其時亦書者見其然而又烝以求乎豐者也

祭公來遂逆王后于紀

祭公者何天子之三公也何以不稱使婚禮不稱主人遂者何生事也大夫無遂事此其言遂何成使乎我也其成使乎我奈何使我為媒可則因用是往逆矣女在其國稱女此其稱王后何王者無外其辭成矣

婚禮不稱主人說已見前所以不稱使者謂以三

公逆女爾 傳前既不知不稱使之意故今復誤  
以為成使乎我天子之后即謀於我不反命而遂  
逆之所以示貶也尚何成之云乎

十年

冬十有二月丙午齊侯衛侯鄭伯來戰于郎

郎者何吾近邑也吾近邑則其言來戰于郎何近也  
惡乎近近乎圍也此偏戰也何以不言師敗績內不  
言戰言戰乃敗矣

戰于奚戰于升陞未嘗不地卽何獨為近邑來之  
為言為其非前定而主乎戰不可言齊侯衛侯鄭  
伯敗我師于郎故變文云爾其為內不言戰言戰  
乃敗同也

十有一年

秋七月葬鄭莊公九月宋人執鄭祭仲

祭仲者何鄭相也何以不名賢也

賢非也嘗入而為王大夫者爾

鄭忽出奔衛

忽何以名春秋伯子男一也辭無所貶

書武成言列爵惟五分土惟三武王以為反商政政由舊則商爵未嘗不列五等也而漢諸儒未見孔氏尚書皆為商爵三等之論謂商止有鬼侯梅伯而無子男武王初定天下始增此二等蓋妄矣而傳亦以為春秋變周從商合伯子男以為一故以鄭忽未踰年之君法當稱子嫌其與伯子男之名相亂成

其君而書名不知經貶鄭忽不稱子者為其不能  
子而奪之也且在喪之子與伯子男之子義自不同夫  
孰不能辨況鄭是伯爵春秋何嘗合子男為一乎所  
謂變周之文從商之質者皆非經本意傳自為說爾  
十有四年

乙亥嘗

常事不書此何以書譏何譏爾譏嘗也曰猶嘗乎御  
廩災不如勿嘗而已矣

非也此與左氏言不害者異義而同失說已見左氏

十有五年

五月鄭伯突出奔蔡

突何以名奪正也

經于諸侯出奔未有不書名者非貶也別二君爾  
惟衛侯出奔楚不名蓋以叔武不當為君而內  
無君也以突為奪正則凡正而名者為何所奪



乎

鄭世子忽復歸于鄭

其稱世子何復正也曷為或言歸或言復歸復歸者  
出惡歸無惡復入者出無惡入有惡入者出入惡歸  
者出入無惡

四例皆非說已見左氏即傳而言鄭突不當為  
君而篡其兄忽當為君而奪於弟突者出有惡  
者也反從出入無惡例書歸忽出入無惡者也

反從出有惡例書復歸可乎忽不言子自以正  
忽非與突為善惡者也不得反不如突而以出為  
有惡矣非特此也衛成公始以殺叔武為伯主所執未歸  
而又殺公子瑕乃從出入無惡例書歸周敬王大  
子之母弟王猛死而國人立之乃從出入俱惡例  
而書入趙鞅去晉陽本不以事欲除君側之惡人  
據之以叛罪不重於欒盈而書入魚石與于蕩山之  
亂不容於宋而出奔罪不輕於荀寅士吉射而書

復入則無一可通矣

邾婁人牟人葛人來朝

皆何以稱人夷狄之也

言夷狄之者是也獨言朝桓之惡而不及旅見則非矣

秋九月鄭伯突入于櫟

櫟者何鄭之邑曷為不言入于鄭末言爾曷為末言爾祭仲亡矣然則曷為不言忽之出奔言忽為君之

微也祭仲存則存矣祭仲亡則亡矣

國者入其國中而得國者也邑者入國之境而未  
得國者也得國言國得邑言邑各以其實非以邑  
不足於國而淺言之也 不言忽出奔不告則不  
書爾鄭自突入之後忽再入而為高渠彌所弑立  
子亶齊人復殺子亶而祭仲立子儀皆不見經不  
可別為義

十有六年

十有一月衛侯朔出奔齊

衛侯朔何以名絕曷為絕之得罪于天子也其得罪于天子奈何見使守衛朔而不能使衛小衆越在岱陰齊屬負茲舍不即罪爾

據傳意謂天子嘗召衛小衆朔不從因問罪懼而奔齊託疾不受命與穀梁言天子召而不往者大畧同此蓋全不知朔奔之因如左氏所書者可見二氏不傳事誤信其所聞而妄以解經

每如此

十有八年

冬十有二月己丑葬我君桓公

賊未討何以書葬讎在外也讎在外則何以書葬君子辭也

君子辭者謂桓見弑于齊讎在外春秋不責魯以力所不能及故書葬若然則前所謂君父弑而臣子不復讎為非臣子者止施之內而已豈所謂父

母之讎不與共戴天者乎傳言齊襄公以九世之  
讎而復紀伍子胥借吳之力以復楚又何以皆賢  
而與之春秋者因事以立法不為一人設也此但  
論讎復不復爾若以齊強魯弱因以怨之遂廢天  
下之復外讎者亦何足以為法此其失與穀梁同  
說已見穀梁

莊公

元年春王正月

公何以不言即位春秋君弒子不言即位君弒則子何以不言即位隱之也孰隱隱子也

前於桓不書即位曰如其意也是如桓公之意也今於莊公不言即位曰隱之也孰隱隱子也是孔子隱之也弒君書即位不書即位所以別其君之與聞乎弒不與聞乎弒桓言如公意猶可也莊言隱子不獨不見莊之意隱桓皆魯君也孔子豈不隱於隱而獨隱桓乎上云子



不言即位而繼云隱子則子者謂莊公也何休  
乃以為隱痛是子之禍則以子為桓公亦非傳  
意

三月夫人孫于齊

孫者何孫猶孫也內諱奔謂之孫夫人固在齊矣其  
言孫于齊何念母也正月以存君念母以首事夫人  
何以不稱姜氏貶曷為貶與弑公也其與弑公奈何  
夫人譖公於齊侯公曰同非吾子齊侯之子也齊侯

怒與之飲酒於其出焉使公子彭生送之於其乘焉  
擗幹而殺之念母者所善也則曷為於其念母焉貶  
不與念母也

夫人在齊而謂念母以首事是經加之虛文也  
夫加之虛文以見母足矣又何以言內諱奔而  
謂之孫乎若然則是實奔非為念母起也此蓋  
傳不見夫人書至故意為在齊又見夫人書孫  
故以為念母不知夫人固已從桓公之喪而歸

其不書至者見魯人之意爾不與念母是子可  
以絕母乎

夏單伯逆王姬

單伯者何吾大夫之命乎天子者也何以不稱使天  
子召而使之也逆之者何使我主之也曷為使我  
主之天子嫁女諸侯必使諸侯同姓者主之諸侯嫁  
女乎大夫必使大夫同姓者主之

王之卿六命其大夫四命卿以氏爵見經則劉子

單子之類是也大夫以氏字見經則南季榮叔之類是也諸侯無四命之大夫則不得有以氏字見者然書於春秋四人焉魯有單伯宋有蕭叔鄭有祭仲陳有女叔三家初未嘗辨學者多不能了以吾考之附庸之孤稱字其為公之孤者亦稱字外臣入而為王大夫稱字其歸復其國者亦稱字各證其事則魯單伯宋蕭叔附庸之孤也鄭祭仲陳女叔嘗入為王大夫者也公羊

穀梁皆以單伯為吾大夫之命乎天子者蓋微  
知之而不盡其說若但國之命大夫此亦三命  
耳安得以氏字見乎何以不稱使亦非所以起  
問凡魯自以卿往京師故書如以見使此天子既  
命我主王姬矣則以單伯逆之非魯事自不  
嫌於不稱使也

王姬歸于齊

何以書過我也

此與莊元年書王姬歸於齊者同亦以我主之故  
也其逆無事故不見逆常事也公羊穀梁見無築  
館之事遂疑為過我不知築館本亦不合書但以  
其築之於外非禮爾左氏記齊侯來逆共姬此豈  
過我云乎

王使榮叔來錫桓公命

錫者何賜也命者何加我服也其言桓公何追命也  
錫與賜異錫者常也所謂彤弓天子錫有功諸侯

也賜者非常也所謂三公一命卷若有加則賜者也故成八年書天子使召伯來錫公命言錫此與文言毛伯來錫公命者同皆於元年見之文始命桓追命也蓋桓終身不朝王故既薨王於莊公即位之元年追錫之爾何以謂之賜乎二名既不辨故遂以為加我服不知此乃正命之為魯侯爾何加之云

齊師遷紀邢鄆郛

遷之者何取之也取之則曷為不言取之也為襄公諱也外取邑不書此何以書大之也何大爾自是始滅也

傳載齊襄公復讎與經皆不合說已見後經書紀季以鄫入于齊紀侯大去其國蓋深致意於紀者何為於襄公而諱之哉遷者徙其君長宗廟社稷而有其地者也宋人遷宿齊人遷陽是矣邢鄆鄆者紀之三邑也齊將滅紀先奪其三邑故與外取



邑繫紀而特書且變文言遷以見齊志爾豈襄公之諱乎

二年

夏公子慶父帥師伐於餘丘

於餘丘者何邾婁之邑也曷為不繫乎邾婁國之也曷為國之君存焉爾

於餘丘當從左氏為國非邑也

三年

五月葬桓王

此未有言崩者何以書葬蓋改葬也

改葬而魯不往會則不書改葬而魯往會則當書  
改卜喪猶言改豈有改葬而反不言改何以別於  
緩喪乎傳但見桓王七年而後書葬故意之爾方  
周之衰王室卑弱禮不備於天子者固多故不足  
於財而求賻於我者有之亦安得必桓王能如期  
而葬蓋傳為天子記崩不記葬必其時之說故不

得不云爾其實左氏言緩者是也

秋紀季以鄆入于齊

紀季者何紀侯之弟也何以不名賢也何賢乎紀季服罪也其服罪奈何魯子曰請後五廟以存姑姊妹齊暴紀而滅之紀何罪之可服而以紀季為賢蓋由以誤襄公之復讎言也

四年

紀侯大去其國

大去者何滅也孰滅之齊滅之曷為不言齊滅之為  
襄公諱也春秋為賢者諱何賢乎襄公復讎也何讎  
爾遠祖也哀公亨乎周紀侯譖之以襄公之為於此  
焉者事祖禰之心盡矣盡者何襄公將復讎乎紀卜  
之曰師喪分焉寡人死之不為不吉也遠祖者幾世  
乎九世矣九世猶可以復讎乎雖百世可也家亦可  
乎曰不可國何以可國君一體也先君之耻猶今君  
之耻也今君之耻猶先君之耻也國君何以為一體

國君以國為體諸侯世故國君為一體也今紀無罪此非怒與曰非也古者有明天子則紀侯必誅必無紀者紀侯之不誅至今有紀者猶無明天子也古者諸侯必有會聚之事相朝聘之道號辭必稱先君以相接然則齊紀無說焉不可以並立乎天下故將去紀侯者不得不去紀也有明天子則襄公得為若行乎曰不得也不得則襄公曷為為之上無天子下無方伯緣恩疾者可也

紀侯譖殺齊哀公事二傳皆無見獨公羊言之史  
記齊世家取之公羊者也然云周烹哀公而立其  
弟靜是為胡公胡公復為哀公母弟獻公山所殺  
自獻公七傳而為襄公襄公益承哀公母弟之後  
非哀公之後也周制內外亂鳥獸行則滅之使紀  
侯誠譖哀公者有明天子紀侯不過誅及其身而  
已何至遂滅其國乎諸侯號辭稱先君上則其太  
祖下則其高祖而已哀公之廟固已親盡而毀矣

先王制禮為可傳也為可斷也故雖天子所以事  
其祖禰者亦不過三昭三穆與太祖之廟為七自  
非太祖六世而迭毀去祧為壇去壇為墀而五世  
之外且無服矣非忘之也禮有節文也所謂父母  
之讐不與共戴天者各以其身言之爾故父之讐  
使辟諸海外孫以下不及焉豈有百世而責之復  
讐者乎傳立三世之論魯以傳聞之世大惡猶不  
諱而與齊以九世之讐復之於今之紀侯亦自相

伐矣

六月乙丑齊侯葬紀伯姬

外夫人不書葬此何以書隱之也何隱爾其國亡矣  
徙葬於齊爾此復讎也曷為葬之滅其可滅葬其可  
葬此其為可葬奈何復讎者非將殺之逐之也以為  
雖遇紀侯之殯亦將葬之也

非也此因諱襄公之失而為之說者也

秋七月



冬公及齊人狩于郕

公曷為與微者狩齊侯也齊侯則其稱人何諱與讎  
狩也前此者有事矣後此者有事矣則曷為獨於此  
焉譏於讎者將壹譏而已故擇其重者而譏焉莫重  
乎其與讎狩也於讎者則曷為將壹譏而已讎者無  
時焉可與通通則為大譏不可勝譏故將一譏而已  
其餘從同同

經凡為公諱者皆沒公此若為公諱言及齊侯狩

于郤可矣何用反人齊侯人齊侯則與微者何辨  
乎且桓與莊皆傳所謂傳聞之世遠而不諱者也  
二人皆非賢君何桓則不諱成宋亂莊則諱與齊  
侯狩乎

五年

秋倪黎來來朝

倪者何小邾婁也小邾婁則曷為謂之倪未能以其  
名通也黎來者何名也其名何微國也

倪為小邾猶楚先言荆後言楚越先言於越後言  
越各從其主人非春秋之辭也若曰未能以名通  
則倪亦名爾與小邾為一耶二耶一則既能以倪  
通何為不能以小邾通若二則安有小邾而言倪  
也滕侯卒不名傳曰微國也今黎來名又曰微國  
等為微國或不得名或特見名則將孰從也

冬公會齊人宋人陳人蔡人伐衛

此伐衛何納朔也曷為不言納衛侯朔辟王也

五國以今年春伐衛而王人子突以明年三月救之則方五國之師興未見所以辟王者也五國實不辟王而傳為之辭雖以正其義而反縱失五國之罪果經之意乎此蓋傳不知經凡不與納者皆不書納也

六年春王三月王人子突救衛

王人者何微者也子突者何貴也貴則其稱人何繫諸人也曷為繫諸人王人耳

傳意以子突為王子突為其救衛不克故貶而繫諸人若微者然經未有以微者貶王子者也王子繫王之稱非繫人之稱今子突既繫諸人矣則安知其為王子乎若欲以微者貶之則稱王人足矣又何必見子突於義兩無當子突字也王人本不得以字見蓋善其救文內無褒王之義即子突以著之春秋計義不計功不責子突之必能克衛而傳正相反也

夏六月衛侯朔入于衛

衛侯朔何以名絕曷為絕之犯命也其言入何篡辭也

諸侯出奔書名說已見前此言以犯命絕之則凡奔而名者豈皆犯命乎入與納本二事納者入納之入者已自入按五國以去年冬伐衛今年六月朔入秋而書公至中有子突救衛之事則子突不克救黔牟而朔實以五國之援得立經不與其納

故以入為文入逆辭也經之意在入不在名以入為篡辭者亦非是蓋公羊穀梁皆不了入納之義盡以為篡故每失之也

秋公至自伐衛

曷為或言致會或言致伐得意致會不得意致伐衛侯朔入于衛何以致伐不敢勝天子也

傳為此言學者皆不能了何休以所伐國服不服言之則當為會伐有致會有致伐者也今考於經

會伐而見致者十有三不致者二其九皆以伐致  
以會致者惟成十六年十七年兩伐鄭之役而已  
桓之十五年成之十年兩伐鄭不致此固無以為  
說矣成後兩伐始伐既未能服鄭而公以僞如之  
譖季孫行父執于晉次伐鄭楚子重救鄭諸侯無  
功同盟于柯陵而還是何以為得意而皆書會乎  
據傳公以楚師伐齊取穀曰何以致伐未得乎穀  
也平丘之會公不與盟大夫執曰何以致會不恥



也穀本無會自不得致會平丘本無伐自不得致  
伐不應以是起問則何休之說殆非傳本意以吾  
觀之蓋謂會而得意則經致不得意則經不致伐  
而不得意則經致得意則經不致故於僖書公至  
自伐楚曰楚已服矣何以致伐楚叛盟也此傳凡  
公行見經者一百七十有六而致者纔八十有二  
不致者九十有四求其說而不得故以為經有不  
致者以別之爾其實亦非也凡諸侯出入禮必告

廟然隱一公獨無致者何哉隱不當為君而不告  
廟也則諸公亦固有不告而不得書者矣亦或史  
失之而不盡見也左氏於桓傳公至自唐曰告于  
廟謂不告於廟則不書此言近矣是告廟則書不  
告則不書經各據其實無所加損也彼伐而致伐  
者因伐而會伐在會前故致伐伐而致會者會而  
謀伐伐在會後故致會爾必以書致為義若有當  
致而或不告不書或史失之而不得書則經何以

見之乎而公羊穀梁每曲為生義初未嘗見事本末但直以意臆之而卒無可通者且僖公會淮謀鄆而為之城齊有亂不果城而還可以言不得意矣而反書致莊公伐齊納子糾不克納而小白先入亦可以言不得意矣而反不書致此類蓋不可勝舉可以知其言之無據也

冬齊人來歸衛寶

此衛寶也則齊人曷為來歸之衛人歸之也衛人歸

之則其稱齊人何讓乎我也其讓乎我奈何齊侯曰  
此非寡人之力魯侯之力也

經言齊人來歸衛寶此於義豈不簡直易明何用復  
以衛人參之乎此蓋疑以衛寶為言故爾然傳前解  
取郕大鼎于宋曰此取之宋其謂之郕鼎何器從名  
地從主人蓋亦謂器之與人非有即而取之者故正  
其本名何衛寶而獨不得正其名哉

七年

夏四月辛卯夜恒星不見夜中星實如雨

恒星者何列星也列星不見何以知夜之中星反也  
如雨者何如雨者非雨也非雨則曷為謂之如雨不  
脩春秋曰雨星不及地尺而復君子脩之曰星實如  
雨何以書記異也

此以實言也雨星者自上而下之辭猶言雨雪之  
雨如雨者衆多之辭猶言號令衆多如雨之雨若  
舊史曰雨星春秋脩之曰星實如雨則二義不同

矣實者至地之辭不及地尺而復者是不至地之辭若舊史謂不至地春秋脩之謂至地則二義亦不同矣春秋蓋未嘗有變舊史而自為之辭者也無麥苗

無苗則曷為先言無麥而後言無苗一災不書待無麥然後書無苗何以書記災也

春秋記災以其害物也其義在物不在災一災不書豈待害物衆而後書乎麥苗同時大水之害一

也麥先種而彊苗後種而弱書法以是為序等為  
災何先後之辨穀梁曰同時者是也

八年春王正月師次于郎以俟陳人蔡人

次不言俟此其言俟何託不得已也

師待陳人蔡人而次于郎此其實事也次不目事  
目以俟陳人蔡人者著魯之緩爾其後郕降本不  
相及而公羊妄一之以為託不得已何休從而為  
諱滅同姓之說若是春秋果有虛加之文者乎蓋

郿本未當滅而傳以為諱滅故併此失之也

甲午祠兵

祠兵者何出曰祠兵入曰振旅其禮一也皆習戰也何言乎祠兵為久也曷為為久吾將以甲午之日然後祠兵於是

祠兵左氏穀梁作治兵當從二氏是亦見不果於進而書而非為久也說已見穀梁

夏師及齊師圍成成降于齊師

秋師還



還者何善辭也此滅同姓何善爾病之也曰師病矣曷為病之非師之罪也

成即邲也左氏為邲其載富辰之言所謂管蔡邲霍魯衛毛聃邲雍曹滕畢原鄆郇為文之昭者是矣傳文既誤以為成又誤以為盛據傳當是同姓之國而易之以魯邑之名魯滅之而遷其降於齊師降而後歸加以事未畢之辭使若先去則三者於經無一書其實者不惟邲滅而謂之降且縱失魯滅同姓之罪而枉齊以彊滅鄰國之

惡如是而為春秋乎其矯妄誣經無所忌憚敢至於  
是凡傳言若此類者皆經之巨蠹學者不可以不察  
九年春

公及齊大夫盟于暨

公曷為與大夫盟齊無君也然則何以不名為其諱  
與大夫盟也使若衆然

大夫不名說已見左氏若諱與大夫盟自當沒公  
何為反見公而不序大夫戊寅大夫盟此豈亦無

君而言衆者哉

夏公伐齊納糾

納者何入辭也其言伐之何伐而言納者猶不能納也糾者何公子糾也何以不稱公子君前臣名也

納與入異吾前言之矣伐而言納以其實書也若魯但以師納之而不伐豈可謂之能納乎若伐而遂納之豈可謂之不能納乎子糾不氏君薨稱子之義爾傳知其不可同當國之說故復為君前臣

名之論諸侯之大夫固不相臣莊公非子糾之君  
自無臣之之理使君前臣名亦未有獨舉名者何  
為而必去氏乎

齊小白入于齊

曷為以國氏當國也其言入何篡辭也

小白不氏亦未三命爾不氏非當國吾於齊公子商  
人言之矣此蓋傳以納為入故與言衛朔者同

八月庚申及齊師戰于乾時我師敗績

內不言敗此其言敗何伐敗也曷為伐敗復讎也此復讎乎大國曷為使微者公也公則曷為不言公不與公復讎也曷為不與公復讎復讎者在下也

內辭皆諱敗唯乾時之戰不諱與外同辭書敗績者不正其忘仇讎而納子糾故雖敗不以為恥也何復讎之謂哉范甯謂讎者無時而可通其言是矣且是時小白雖已入齊而子糾猶在魯不以為納子糾而強以復讎在下言之孰有知其然者

其曰不與復讎在下而不言公者无非復讎審出於誠耶則臣子言之公行之可以無貶矣如不出於誠而姑以為言則臣子亦偽而已何獨責於公哉

十年春

二月公侵宋

曷為或言侵或言伐猶者曰侵精者曰伐戰不言伐圍不言戰入不言圍滅不言入書其重者也

傳以精辨辨侵伐與左氏言有鐘鼓無鐘鼓者同  
皆畧知之而不盡其本意說已見左氏

三月宋人遷宿

遷之者何不通也以地還之也子沈子曰不通者蓋  
因而臣之也

傳言遷者謂環而守之也凡經書遷皆謂徙其君  
長宗廟社稷云爾何獨于宿見環而不通經未嘗  
有是意也

夏六月齊師宋師次于郎公敗宋師于乘丘

其言次于郎何伐也伐則其言次何齊與伐而不與戰故言伐也我能敗之故言次也

凡言次者皆止而有所待也二師止于郎蓋謀以伐我也齊知其不可而去我用公子偃之謀乘宋之不整追而敗之于乘丘此亦理之所宜有左氏言之是矣所以言宋師而不及齊師地乘丘而不及地郎傳蓋不知其事故加伐以為之言而謂齊與



伐不與戰然則書齊師宋師伐我公敗宋師于乘  
丘豈不甚明何用沒伐而言次乎所謂我能敗之  
故言次者自當直記敗宋師齊既不與伐何次之  
云此亦不知魯伐宋之實故也

秋九月荆敗蔡師于莘以蔡侯獻舞歸

荆者何州名也州不若國國不若氏氏不若人人不  
若名名不若字字不若子蔡侯獻舞何以名絕曷為  
絕之獲也曷為不言其獲不與夷狄之獲中國也

傳為此七例以為通春秋而言耶則春秋大夫書  
氏書人書名書字者未嘗與諸侯州國爵相通止  
為諸侯言耶則諸侯未有書氏書字者其書名之  
義亦與書州書國書子之義不類夫五等皆爵也  
此末獨以子為最優度其意似為荆起專為外裔  
言然荆者九州之別也楚荆州之一國爾故商頌  
言奮伐荆楚謂荆之楚猶魯頌言荆舒是懲亦荆  
之舒楚入春秋先以荆自名蓋冒州以為大其後

自強始復其本號經但據其實書亦傳所謂地從  
主人者也譬之徐亦夷也而冒徐州之稱其後微  
弱自不改故經亦從之豈楚而抑以為荆者乎若  
然荆大而楚小亦不得言州不若國也狄以氏見  
惟潞氏甲氏此乃其國號與赤狄之種殊族者猶  
言英氏亦豈春秋抑之乎且潞氏甲氏亦未見其  
為進于稱楚者氏不若人亦非也國而進為人若  
楚言楚人吳言吳人猶云可也設潞氏甲氏有善

可進而為潞人甲人乎名貶辭也吳楚惟見于卒  
書名字則未之聞也何人不若名名不若字之有  
唯書子者蕃服在中國之內雖大曰子得其本爵  
為美然亦不可與字並言七者無一可據皆不可  
行于經外經於諸侯大夫有言執者有言獲者有  
言以歸者執者以罪拘止之者也獲者戰敗而力  
得之者也以歸者囚服而就虜者也其義不同而  
經或名或不名名者不復者也不名者復歸其國

者也各以其事參考之可見蔡侯名而不言獲蓋  
因虜而不復者也傳本以秦為外如經書秦獲晉  
侯吳獲陳夏齧齊國書何為復與其獲中國乎

十有一年

秋宋大水

何以書記災也外災不書此何以書及我也

外災不書謂諸國也若宋為二王之後則未嘗不  
書然亦必告而後書不告則不書也此以為及我

書則魯自被災何不書於魯而反書宋乎非詳內畧外之義矣

十有三年

冬公會齊侯盟于柯

何以不日易也其易奈何桓之盟不日其會不致信之也其不日何以始乎此莊公將會乎桓曹子進曰君之意何如莊公曰寡人之生則不若死矣曹子曰然則君請當其君臣請當其臣莊公曰諾於是會乎

桓莊公升壇曹子手劒而從之管子進曰君何求乎  
曹子曰城壞壓竟君不圖與管子曰然則君將何求  
曹子曰願請汶陽之田管子顧曰君許諾桓公曰諾  
曹子請盟桓公下與之盟已盟曹子操劍而去之要  
盟可犯而桓公不敗曹子可讎而桓公不怨桓公之  
信著乎天下自柯之盟始焉

齊小白晉重耳在春秋諸侯彼善於此則孔子嘗稱  
之矣所謂九合諸侯一匡天下者是也至於經則未

嘗與焉經王法也非三代所以得天下者不道何小白  
重耳之足言乎故孟子曰仲尼之徒無道桓文之事三  
尺童子羞稱五伯雖荀卿其猶知之而公羊穀梁每謂  
經於二伯有異文有言為小白諱者矣有言為重耳諱  
者矣此復為盟不日會不致之論豈有聞於孔子者哉  
妄以其淺陋之意度之爾凡經書盟多不日非特桓也  
而會亦多不致吾前嘗言之矣今傳既摘取其見於桓  
者以為說知其不可盡合則又更為之辭於危之盟日



則以為危莊公於葵丘之盟日則以為危小白於納  
幣而致則以為公一陳佗於救徐而致則以為久夫  
既以信小白為例則不得為莊公及久近而變若為  
莊公及久近而變則孰不可變乎葵丘一矜而叛者  
九國事本無實審為有之是一人之身而信之於前  
危之於後亦惡在其以不日為例也 曹子左氏所  
謂曹劌者也司馬遷以為沫以傳考之其事皆無有  
且所謂城壞壓竟者謂齊侵魯地而深入也按齊自

莊公以來兩主王姬之嫁夫人饗會齊侯與其師者四皆與齊為好齊未嘗加兵於我至十年我以子糾之故一敗齊師於長勺齊亦未嘗報安得所謂城壞壓竟者哉齊既未嘗侵我地則固無曹子請田之事歸汶陽田亦不見經至鞏之敗以晉令始歸我事在成二年與此不相接此公羊傳聞之誤戰國之士從而文之復謂魯於齊嘗三戰三敗與經書長勺事正相反尤可見其妄

十有四年春齊人陳人曹人伐宋

夏單伯會伐宋

其言會伐宋何後會也

齊人陳人曹人伐宋本不與魯期魯聞而以單伯  
往會如言陳侯使袁僑如會者何以見其期而後  
會也

十有六年

冬十有二月公會齊侯宋公陳侯衛侯鄭伯許男曹伯

滑伯滕子同盟于幽

同盟者何同欲也

非也說已見左氏

十有七年春齊人執鄭瞻

鄭瞻者何鄭之微者也此鄭之微者何言乎齊人執之書甚佞也

微者弑君殺大夫春秋猶不以名見一以盜書之鄭瞻但佞人何為獨以名書乎此與邾庶其莒慶

同再命之大夫爾左氏謂以鄭不朝而執則鄭前  
年已同盟于幽非不服齊者也是時小白始霸諸  
侯皆朝之故以責鄭然有天子在上小白亦安能  
必諸侯之朝已哉此經所以不以侯執以見非伯  
討且不稱行人非其使之事也傳但見瞻以微者  
見執書且後書逃故逆以為佞豈其實哉

夏齊人濊于遂

濊者何濊積也衆殺戍者也

左氏作殲當從左氏殲盡也無積義書曰殲厥渠  
魁盡渠魁之辭也詩曰殲我良人盡良人之辭也  
秋鄭瞻自齊逃來

何以書書甚佞也曰佞人來矣佞人來矣

甚佞之義於經文無見所謂逃來者猶言來奔也  
在本國則可言奔在他國則不可言奔故謂之逃  
竊以其身免者也以逃為貶則可無以見其為佞  
人

十有八年

夏公追戎于濟西

此未有言伐者其言追何大其為中國追也此未有伐中國者則其言為中國追何大其未至而豫禦之也其言于濟西何大之也

非也追非美辭過我而躡之爾

二十年

夏齊大災

大災者何大瘠也大瘠者何病也何以書記災也外災不書此何以書及我也

周官有大札有大荒有大歲大札疾也大荒饑也大歲水火之害也齊非二王之後而亦得書者以其災之甚故加大焉猶陳鄭宋衛四國同日災而書爾以病言之誤也曰及我亦非是說已見前

二十有二年春王正月肆大省

肆者何跌也大省者何災省也肆大省何以書譏何



譏爾譏始忌省也

大省為災省如何休言以為子郊曰省吉事而不舉可也則為忌其諱而不舉之義然訓肆為跌跌豈忌哉即其說自不能通蓋仍夫人薨之後為之辭爾此蓋未嘗見青災肆赦之文故也二十有三年春公至自齊

桓之盟不日其會不致信之也此之桓國何以致危之也何危爾公一陳佗也

公如齊納幣言非禮可矣安知其淫於齊而與陳

佗比哉此拘桓會不致之妄也

荆人來聘

荆何以稱人始能聘也

稱人者其臣來也猶吳會於戚得稱吳人春秋常  
法也不得為別義此蓋拘其國不若人之誤也七  
等進退之辨傳本謂其君言也今國進而入豈其  
君自來聘乎

二十有四年

夏公如齊逆女

何以書親迎禮也

非也說已見左氏

秋公至自齊八月丁丑夫人姜氏入

其言入何難也其言日何難也其難奈何夫人不樓  
不可使入與公有所約然後入

此事既無實不知其何據如何休所言迂誕亦甚  
矣蓋傳不知書入為責娶讎女之義而拘其書之

之例故妄為之辭也

戊寅大夫宗婦覲用幣

宗婦者何大夫之妻也覲者何見也用者何用者不宜用也見用幣非禮也然則曷用棗栗云乎賸脩云乎

大夫宗婦蓋二事宗婦非大夫妻則庶婦之宗婦何休以為大夫為宗子者之妻此言宗婦諸侯同宗別嫡夫人之宗婦則是矣然莊公使大夫之宗

婦用幣覲夫人者欲以大夫重夫人也曾何大宗  
小宗之擇哉宗婦亦大夫妻也庶婦亦大夫妻也  
所以為重者在大夫爾則宗婦蓋公同宗之婦非  
大夫之宗婦左氏記御孫之諫可考當從左氏

冬戎侵曹曹羈出奔陳

曹羈者何曹大夫也曹無大夫此何以書賢也何賢  
乎曹羈戎將侵曹曹羈諫曰戎衆以無義君請勿自  
敵也曹伯曰不可三諫不從遂去之故君子以為得

君臣之義也

禮侯伯之卿視公皆三命其大夫再命子男之卿皆再命其大夫一命春秋所謂大夫者通卿言也吾前於使率言之詳矣秦鄭皆伯國也其卿當以名氏見而適無書於經者若鄭之宛瞻秦之術則再命之大夫而以名見者矣邾莒吳楚皆子國也無三命之卿固不得以名氏見而其卿再命則當以名見故邾有快有庶其有畀我莒有孚有慶有

牟夷有意恢吳有札楚有椒有宜申有屈完公子  
嬰齊屈建蘧罷之類得以氏見者僭也曹亦伯國  
與秦鄭同故公子首公孫會以三命之卿見矣而  
公羊穀梁每為曹秦邾莒吳楚無大夫之論學者  
疑焉吾嘗攷其說是以未見周禮而蔽其所聞若  
王制所謂小國二卿皆命於其君者以為無命大  
夫爾則王制之誤其傳不為無自故穀梁於莊傳  
曹殺其大夫言大夫不稱姓名者無命大夫也是

公羊穀梁之知曾鄭氏之不若矣然曹伯國也亦  
不得從小國二卿之說蓋又見曹之微弱而妄意  
之不知其國雖微其爵固在也古者豈以國之彊  
弱而為命數之損益哉由是推之二氏言無大夫  
者皆不可施於經吾不復以一二正其妄學者於  
是可以察矣所謂曹羈者曹君也按下書赤歸於  
曹與前言突歸於鄭鄭忽出奔衛同文此豈大夫  
之謂乎



赤歸于曹郭公

赤者何曹無赤者蓋郭公也郭公者何失地之君也  
此言尤不可解經未有以國爵書諸侯而先見名  
者審赤實為郭公何不曰郭公赤歸於曹而故錯  
之哉諸侯適他國非朝即奔未有非其國而言歸  
者此左氏不著其事而杜預釋之甚詳雖未必有  
據然其義與經合也

二十有五年

六月辛未朔日有食之鼓用牲于社

日食則曷為鼓用牲于社求乎陰之道也以朱絲營社或曰脅之或曰為闇恐人犯之故營之

此為合禮則不書矣諸侯用幣於社伐鼓於朝天災有幣無牲今鼓用牲於社所以書尚何求陰之道哉說已見左氏

秋大水鼓用牲于社于門

其言于社于門何于社禮也于門非禮也

禮以雩宗祭水旱宗當為禋皆有壇焉禋門用瓢  
齋而已用牲于社于門皆非禮也故書合禮則亦  
不書矣

二十有六年

曹殺其大夫

何以不名衆也曷為衆殺之不死于曹君者也君死  
乎位曰滅曷為不言其滅為曹羈諱也此蓋戰也何  
以不言戰為曹羈諱也

列國大夫雖衆不過三卿晉殺卻錡卻犢卻至蓋  
累書之矣何為衆則不名哉蓋傳於殺大夫例不  
辨有罪無罪故不知此以無罪則不名左氏之言  
是也曹羈誠賢然國之大事莫大於戰君死又戰  
之大焉豈以一大夫之故而使曹下不見其與戎  
戰上不見其君滅乎於經既無文此蓋仍前三諫  
之誤而鑿言之也

二十有七年

秋公子友如陳葬原仲

原仲者何陳大夫也大夫不書葬此何以書通乎季子之私行也何通乎季子之私行辟內難也君子辟內難而不辟外難內難者何公子慶父公子牙公子友皆莊公之母弟也公子慶父公子牙通乎夫人以脅公季子起而治之則不得與於國政坐而視之則親親因不忍見也故於是復請至於陳而葬原仲也諸侯大夫私行出疆必請反必有獻士私行出疆必

請反必告禮也未有不通乎私行也其於適者之死  
君為訃之曰吾子之外私寡大夫某不祿亦禮也訃  
之則葬之未有不通乎葬也其不見於經小事故不  
書也季子之特書春秋蓋有義焉而曰君子辟內難  
不辟外難以通乎季子之私行則未之聞夫如吳季  
札之聘使其國自相魚肉卒至於亡而莫問謂之辟  
內難可也而春秋未嘗與何季子而與之乎如公羊  
所言季子起而治之則不得與乎國政坐而視之則

親親因不忍見於是請而至陳是季子欲全其身委其君而棄其國也以為吳季札則可以為見與於春秋則不可此蓋公羊微聞其事而不聞其實故其叛理如此其以慶父牙皆莊公之母弟亦非是慶父以公二年氏公子帥帥伐於餘丘已為大夫莊公年纔十五不應慶父弟而已能將兵杜預蓋知之傳獨稱季友為文姜之愛子慶父見論語亦氏孟孫先儒謂仲孫者慶父僭嫡欲次莊公而自稱之辭孟孫者其

庶兄魯人稱之之辭與叔牙同母皆庶子故牙欲立之此為近實

二十有八年春王三月甲寅齊人伐衛衛人及齊人戰衛人敗績

伐不日此何以日至之日也戰不言伐此其言伐何至之日也春秋伐者為客伐者為主故使衛主之也曷為使衛主之衛未有罪爾敗者稱師衛何以不稱師未得乎師也



此以左氏考之齊之伐衛蓋以王命討衛立子頽之  
罪也衛不服而戰故以衛主戰言衛未有罪者不見  
其本事而誤以不會幽意之也稱人貶也齊之稱人  
亦以霸主不能討衛待王命而後討也凡經書戰書  
敗績者傳皆以為偏戰若衛未得師則詐戰爾經何  
得以戰敗績書哉

冬築微

大無麥禾

冬既見無麥禾矣曷為先言築微而後言無麥禾諱  
以凶年造邑也

經先書築微而後言大無麥禾蓋國用虛實歲杪  
而後知之也傳既誤以無麥禾為災害故以凶年  
造邑為諱若是則經固錯其序使若非以凶年造  
邑者是亦變亂事實而非諱也

三十年

秋七月齊人降鄣

鄭者何紀之遺邑也降之者何取之也取之則曷為  
不言取之為桓公諱也外取邑不書此何以書盡也  
邑必有所附之國未有無君長而能自立者也邲  
鄆邲在當時已不能有鄭安得獨存於今蓋紀附  
庸之國紀亡別屬他國而不屈於齊者也不言取言  
降見力服之爾

齊人伐山戎

此齊侯也其稱人何貶曷為貶子司馬子曰蓋以操

之為已蹙矣此蓋戰也何以不言戰春秋敵者言戰桓公之與戎狄驅之爾

言貶者是矣而非為戎言也此蓋見後言齊侯來獻戎捷故云爾小白加兵於中國者固不一何獨以山戎而反貶之哉是蓋責其未能事王室而勤遠畧也

三十有一年春築臺于郎

何以書譏何譏爾臨民之所漱浣也

一歲三築臺不必以事而知其過也傳皆各為義非

矣使不以臨民浣漱不以遠不以臨國則可築乎

三十有二年

秋七月癸巳公子牙卒

何以不稱弟殺也殺則曷為不言刺為季子諱殺也此非所以起問凡卒公子自應以氏惟殺之責其不兄然後言弟賢之然後言弟牙欲顯其罪誅之則當如刺公子偃書刺今既以親親之道過惡不直誅而酖之傳所謂使託若以疾死然則書卒乃

常法矣何為復見殺乎傳蓋見書公弟叔盱卒故  
云耳而不悟其非類也夫所謂諱者不言刺言卒  
是也若復以不弟見之是季友欲隱而經暴之安  
在以為諱乎



